

4.

DEO OPTIMO MAXIMO UNI ET TRINO,

VIRGINI DEI-PARÆ, ET S. LUÆ,
Orthodoxorum Medicorum Patrono.

QUÆSTIO MEDICA,
QUOD LIBETARIIS DISPUTATIONIBUS
*manè discutienda in Scholis Medicorum, die Jovis tertîa
mensis Dêcembris, anno Domini M. DCC. LXXII.*

M. SANCTO - LUDOVICO GUINDANT,
è Regiâ Scientiarum Societate Monspeliensi, &c. Doctore Medico, Præsîde.
*An inter præcipuos respirationis usus, chili ex intestinis in sanguinem
propulsio?*



ULLA pars in corpore humano, nullum est organum quod
suarum functionum mechanismo, utilitate, perennitate non sit
prorsus admirabile; sed inter cætera pulmonem eminere
nemo ierit inficias, quippe visceris hujus functio, seu respi-
ratio, tanti est momenti & ita vitæ essentialis, ut vulgari
sermone respirare & vivere idem sonent. Sive inspiratio-
nem, sive expirationem consideres, tum ex hac, tum ex illâ

pendent & oriuntur varii nec satis prædicandi effectus.

Celebrent singulos Physiologi: dicant aeris per inspirationem irruentis
Phænomena; sanguinem tunc per vasa sui juris facta liberius, copiosius
affluentem; eidem æstuanti refrigerium & fulco nigricanti colorem purpu-
reum conciliatum; in eundem per poros vesicularum absorbentes pabulum
quoddam æthereum, vitæ quamdam materiem insinuatam. Dicant pulmo-
nis, tunc turgidi, beneficia auxiliantia, pressionis ope, in infimi ventris vis-
cera; in hepar ad bilis tardæ & crassæ secretionem, circulationem, excretio-
nem promovendam; in intestina ad fœces propellendas, excernendas; in ves-
ficam, vel non satis per se contraçilem, vel nimium resistente sphinçtere,
ad urinæ effluxum determinandum, accelerandum; in uterum ad infantem
jam maturum & excarcerationis impatientem in suis conatibus, secus va-
nis, adjuvandum &c.

Nec vicissim prætereant motus expiratorii laudes: enumerent ab isto motu
pulmonis compressionem; aeris retrogradi expulsionem; cum aere vaporem
excrementitium foras amandatum; sanguinis compressi ad cor propulsionem;
eundem istâ compressionis alternatione tritum, elaboratum; neque omittant
quid pulmoni aerem expiranti debeant loquela, musice, ars oratoria; expli-
centque quo mirabili artificio aer expiratus in glottidem incurrens, pro ma-
jori aut minori illius rimâ variè vibratus, deinde per os & cava narium reso-
nans, fiat vocis & cantus materies & partim instrumentum. &c.

Nos etiam professi tot & tanta Phænomena rapiunt in admirationem;
sed datur adhuc unde magis actionem respiratoriam decantemus, hicque
in eo ipsius effectu considerando speciatimque expendendo juvat immorari,
quo nullus est utilitate prior, & quo deficiente cæteri omnes deficerent, chili
nempe ex intestinis in sanguinem propulsione.

II.

CHILUS liquor albus, lacteus, reparando & renovando sanguini des-
tinatus, è quolibet alibili, seu vegetali, seu animali elicitor, nil nisi

condimenta suppeditante regno minerali. Alunt vegetalia ratione substantiæ mucilaginosæ, sapore subdulcis, facili fermentescētis, corporis mucosi dictæ, intrâ illorum fibrosam compagem delitescētis; animalia verò ratione succi facili in gelatinam concresecētis, pariter intrâ illorum cellularem texturam contenti coercitque, qui quidem nil aliud est quam corpus ipsum mucosum, motu animali elaboratum velutique maturatum. Materia igitur chili proxima mucus vegetalis & gelatina animalis. Hæc solvere ex alimentis & in chilum convertere digestionis opus.

Digestio fit in ventriculo & duodeno. Non malè eam in solutione & fermentatione reponimus. Ad illam præparat masticatio, dum, prægressâ ut plurimum per ignis actionem cōctione, dentes alimenta incidunt & conterunt, simulque intra illorum fragmenta saliva oris penetrans, cum eisque subacta, fibrosæ & cellulares nexu disjungit, & ad ulteriorem disponit disjunctionem.

Digestio solutio est quatenus cum salivâ ex ore deglutitâ novus succi gastrici fons massæ alimentosæ immiscetur, & intrâ minimas illius moléculas virtute suâ saponaceâ pervadens, quæ adhuc cohærent dissociat, corpusque, seu mucosum, seu gelatinosum, ex ultimis tùm fibrarum, tùm cellularum impedimentis extricat expeditque.

Deinde faventibus, opusque promoventibus, aeris in ingestis contenti, sese dilatantis, partemque dimoventis, extrusione motu ventriculi peristaltico, pressione respirationis alternâ, viscerum circumstantium calore & actione, digestio fit fermentatio, quatenus illud corpus fermentescibile, semel nudum, siquæ juris factum, mox in motum agitur intestinum, quo ipsa ejus principiorum aggregata resoluntur, hæcque principia, novo juncta connubio, novum inter se ineunt ordinem, novâque indutâ formâ lætiscunt in chilum.

Morus ille dum peragitur, novus liquor è ventriculo, partim vi illius peristalticâ indefinente, partim adjacentium compressionibus, sensim detruitur in duodenum. Ibi labor imperfectus ad finem perducitur. Illuc affluentibus salivâ pancreaticis & utrâque bile solvuntur non soluta, & fermentescunt nondum fermentata. Tandem absoluto opere, (quod utinam semper pro naturæ votis finirent succedere quantita, & qualitas ingestorum, & conditio seu sanitas ingerentis!) sensim pacatur motus, fierique incipit depuratio & defæcatio, partibus heterogeneis & crassioribus sibi accrescentibus in moléculas, facili per excessum sui voluminis & ponderis à mero liquore scernendas. Demùm ope motûs vermicularis factâ propulsione in reliquam canalis intestinalis longitudinem, feculentæ moles, è parietibus ad axim repulsæ, ad anum pergunt iter, foras eliminandæ. Chilus autem ipse, ad meliora paratus, multiplici valvularum impedimento ad circumferentiam retardatur, hiantibus ibi poris innumeris absorbendus.

III.

QUEMADMODUM in vegetantibus radices intrâ terram repentes emittunt huc & illuc radículas, & ex his radicularum capillamenta, quorum ope succi terrestres suguntur & combibuntur, deindeque motu vegetativo è capillamentis in radículas, ex his in radices, è radicibus in totam arboris propaginem assumuntur, trunco, ramis, ramulis, foliis, floribus, fructibus nutrimentum partituri; itâ apud hominem lactæ venter, in exteriori intestinorum superficie efflorescentes, intrâ illorum membranas emittunt venulas & ex his in infinitum venularum capillamenta, quorum ostiis seu finibus ex internâ superficie chilus hauritur & forbetur; deindeque, non dispari progressionem, è capillamentis per venulas, venas, glandulas mesentericas, venas ampliores, cisternam lumbarem & ductum thoracicum ad ipsas devehitur sanguinis vias, motu animali huic assimilandus, maturandus, & vitæ fontem cūlabet corporis parti dispersurus.

Iter ergo Chiliferum vasa lactea primi, secundi & tertii generis, semel aut bis glandulæ mesentericæ, cisterna lumbaris, seu chili receptaculum, ductus pecqueti seu thoracicus; quorum hic non prætermittenda membrana tenuis,

pellucida, flexilis, nec præsertim mirabilis valvularum dispositio, chili progreffum & ascensum sinens, regreffum verò descensumque negans.

Cisterna lumbaris in abdomine ad radicem mesenterii posita, sit è lacteorum omnium confluxu. Ultimæ dorsali primæque lumbari vertebræ incumbens, figuram exhibet, modò vesicularem oblongam, modò cilindricam, &c. &c. In illam limpha, redux ex inferioribus corporis partibus, distinctis propriisque vasculis appellit, chilumque jam in glandulis limphæ ex intestinis reduce dilutum, iterum diluit magisque aptat ad assimilationem. Collo suo prolongato & ad calami scriptorii diametrum angustato definit in canalem Pecqueti, ratione sitûs thoracicum dictum. Hic aorta posterior, vertebrisque dorsalibus anterior, medius inter has & illam ascendit, sensum limphaticis ex omni thorace affluentibus ditior factus; moxque venas subclavias altitudine prægeti, ad sinistram ut plurimum, siphonis instar reflectitur, & in posticam illius partem effluit rivuli instar in fluvium.

I V.

PLURA chilo propellendo favent, sed primariam hujus effectus causam à motu respiratorio deducimus.

Scilicet, d. m. inspiramus, diaphragma deprimitur, costæ elevantur, sic augetur in omnem dimensionem thoracis capacitas. Singulæ partes in eo contentæ minùs comprimuntur. Inde in ductu thoracico ipsæque subclaviæ, minùs pressis, ex axi in parietes nifus efficacior, & minor affluentibus resistentia. Eodem ipso instanti aeris pressio in internas thoracis partes imminuta, in viscera abdominalia eadem remanet; præterea hæc viscera, ipsa proindè cisterna tùm Diaphragmatis vi contractili, tùm musculorum abdominalium vi elasticâ resistentiæ, violentè comprimuntur, sic vasorum parietes in liquida vehementius urgentur, & si quâ detur exitus, illa cogunt effugere; sed ex suprâ dictis datur ille exitus è cisternâ lacteisque compressione arcâtis in ductum & subclaviam minùs resistentia velutique ampliata. Chilus ergò juxta leges hidraulicas, in ductum hunc raptus, copiosior debet assurgere, rivuloque pleniori in subclaviam effluere.

Succedente verò expiratione, tùm musculorum costas deprimentium actione, tùm ipsa aeris pressione tunc resitutâ, tùm etiam diaphragmatis in suam convexitatem restitutione, quidquid latet in thorace, ductus proindè thoracicus ipsaque subclaviæ longè magis comprimuntur. Tunc ergò ductus ille cogitur eam chili priùs admissi partem emittere, quam imperat compressionis gradus. Ne pars illa retroferatur & descendat valvulæ obstant; pergit ergò viam ad subclaviam: hæc quidem ipsa comprimitur expiratione, sed, favente auriculæ cordis dextræ minimè distantis dilatatione, patet in illam chilo, licet minor quam in inspiratione, sufficiens tamen aditus. Interea cessat pressionis ab aere in abdomen excessus. Minor est etiam à diaphragmate fursùm assurgente in illius viscera compressio. Sua igitur tunc redditur vasorum parietibus libertas, & sua lacteis vasis cisternæque capacitas. Inde in his, modò per inspirationem partim depletis, quoddam, ut aiunt vacuum; indè chili ex intestinis in hæc irruptio.

Non nam è igitur tempore inspirationis thoracem cum antliâ inspirante & abdomen cum antliâ premente comparaveris. Utriusque effectû simultaneo & concurrente chilus in totam sui itineris longitudinem fluxu continuo propellitur.

Vice versâ, dùm expiramus, sit thorax antlia premens, quâ chilus è ductu in subclaviam expressus cogitur effluere. Simul in abdomine cisterna lacteisque vasa sunt antlia aspirans, in quam chilus ex intestinis ob vacuum seu minorem resistentiam ruit & accumulatur, novâ mox inspiratione in ductum aspirandus.

Ex illarum antliarum alternatione, vel etiam solâ, facile deducitur & expliatur chi ipropulsio, partimque videtur hinc fieri cur in exercitiis, frequentiore & ampliore respiratione chilum citius propellente, sicque intestinis & ventriculo citius vacuatis, sæpiùs renascantur sitis & fames. Cur desideriosi

& inertes ob rationem contrariam pauca & raro appetant . . . Cur in phthisi confirmatâ, propter imminutam & fere deficientem pulmonis expansionem, ipsamque proinde anthracum alternationem, chilus, tum minus aspiratus, tum minus pressus, in suis vasibus congeratur, hæc vasa & glandulas mentericas infarciat, tandem succedentis chili ingressum omnino præpediat, indeque orto fluxu colliquativo, dejectaque cum fecibus nutritionis materie, sensim tabescat æger, & medico astanti, quantum ad chili propulsivum valeat respiratio, triste & miserabile fiat argumentum.

V.

UBJICES illam chili propulsionem ab ipso intestinorum motu peristaltico repetendam esse. Absit quidem ut hic debitas illi motui laudes detrahamus. Minime nos latet naturam causarum simplicitate & effectuum multiplicitate semper admirabilem, quo tempore fecum expulsionem per hunc motum invigilat, eo etiam ad chilum propellendum concurrere: non latet quantâ vi chilus hoc motu indefinenter compressus, valvulis iter juxta axim negantibus, in concavam intestinorum superficiem impellatur, quo proinde nisi per lacteorum capillarium ostiola in viam chiliferam tendat. Sed ipsa undenam nistis hujus efficacia? Nonne etiam a respiratione suis alternationibus continuo resistentias imminuente? Actio igitur intestinalis causa quidem chili propulsi auxiliatrix habenda est, non verò primaria. Effectum augeat, expedit, accelerat, sed eâ sublatâ non tolleretur effectus. Solâ respiratione, licet minus expeditè, posset propelli chilus. Patet asserti veritas è situ & dispositione vasorum chiliferorum, mechanicisque in illa respirationis effectibus.

Patet proinde inter respirationis usus chili propulsionem annumerandam esse. Jam verò etiam inter ipsos præcipuos usus facile eam nobiscum annumeremus, si advertas nullum alium respirationis effectum utiliore, magisque necessarium esse; hoc sublatò mox aliis finem imponi; si aliis cessantibus damnum inferatur magis repentinum citiusque lethale, ab hujus cessatione exitium sequi, tardius fortè, at non minus certum & ineluctabile.

Præterea si attendatur respirationem & ipsam chili per vias chiliferas transmittendi necessitatem simul incipere; quandiu limpha nutrens à matre prægnante ad infantem per venam umbilicalem, venam portarum canalemque venosum in inferiorem cavam infertur, tandiu non haberi respirationis alternationes; statim atque verò infanti, vix nato, jam non aliundè quam ex intestinis sanguis renovari, vitæque sustentari potest, statim in motum agi respiciendi instrumenta; certè ex his & supra expositis argumentis pronum erit concludere.

Ergo inter præcipuos respirationis usus, Chili ex intestinis in sanguinem propulsio.

DOMINI DOCTORES DISPUTATURI.

M. Josephus PHILIP.

M. Hugo GAUTHIER. Consultarius Regis Medicus.

M. Claudius-Josephus GENTIL. Militarium Nosocomiorum ad Regis Exercitium Medicus.

M. Joannes d'ARCE.

M. Ludovicus - Guillelmus BOYROT DE JONCHERES.

M. Edmondus-Thomas MOREAU.

M. Franciscus THIERY DE BUSSY, Consiliarius Medicus Regis Ordinarius in Supremæ Senatus Parisiensis, Pathologiae Professor.

M. Carolus SALLIN.

M. Michael-Ludovicus FERNAGE, Antiquior scholæ Magister, Eques & Censor Regius.

Proponerebat Parisiis THOMAS LE TENNEUR Constantiensis, Doctor Medicus Cadomenis, necnon Saluberrimæ Facultatis Medicinæ Parisiensis Baccalaureus, Theses Author. A. R. S. H. 1772. à sextâ ad meridiem.